

四庫全書

史部

欽定四庫全書

史部

郡齋讀書志卷四上至下

詳校官侍講學士臣法式善

編修臣程嘉謨覆勛

總校官檢討臣何思鈞

校對官中書臣宋枋遠

騰錄監生臣李汝誠

欽定四庫全書

郡齋讀書志卷四上

宋晁公武撰

集部其類有三一曰楚辭類二曰別集類三曰總集類  
內別集很多復分為上中下昔屈原作離騷雖詭譎不  
槩諸聖而英辯藻思閎麗演迤發於忠正蔚然為百代  
詞章之祖衆士慕嚮波屬雲委自時厥後綴文者接踵  
於斯矣然軌轍不同機杼亦異各名一家之言學者欲

矜式焉故別而聚之命之為集蓋其原起於東京而極於有唐至七百餘家當晉之時摯虞已患其凌雜難觀嘗自詩賦以下彙分之曰文章流別後世祖述之而為總集蕭統所選是也至唐亦且七十五家嗚呼盛矣雖然賤生於無所用或其傳不能廣值水火兵寇之厄因而散落者十八九亦有長編鉅軸幸而得存其屬目者幾希此無他凡以其虛辭濫說徒為美觀而已無益於用故也今錄漢迄唐附以五代本朝作者其數亦甚衆

其間格言偉論可以扶持世教者為益固多至於虛辭  
濫說如上所陳者知其終當泯泯無聞猶可以自警則  
其無用亦有用也是以不加銓擇焉

楚辭類

楚辭十七卷

後漢校書郎王逸叔師注楚屈原名平為懷王左徒博  
聞強識嫻於辭令後同列心害其能而讒之王怒疏平  
平自傷忠而被謗乃作離騷經以諷不見省納及襄王

立又放之江南復作九歌天問九章遠游卜居漁父大招自沉汨羅以死其後楚宋玉作九辨招魂漢賈誼作惜誓淮南王小山作招隱士東方朔作七諫嚴忌作哀時命王褒作九懷劉向作九歎皆擬其文而哀平之死於忠至漢武時淮南王安始作離騷傳劉向典校經書分為十六卷東京班固賈逵各作離騷章句餘十五卷闕而不說至逸自以為南陽人與原同土悼傷之復作十六卷章句又續為九思取班固二序附之為十七篇

按漢書志屈原賦二十五篇今起離騷經至大招凡六  
九章九歌又十八則原賦存者二十四篇耳并國殤禮  
魂在九歌之外為十一則溢而為二十六篇不知國殤  
禮魂何以系九歌之末又不可合十一為九然則謂大  
招為原辭可疑也夫以大招為義恐非自作或曰景差  
蓋近之其卷後有蔣之翰跋云晁美叔家本也

楚辭釋文一卷

未詳撰人其篇次不與世行本同蓋以離騷經九辯九

歌天問九章遠游卜居漁父招隱士招魂九懷七諫九  
歎哀時命惜誓大招九思為次按今九章第四九辯第  
八而王逸九章注云皆解於九辯中知釋文篇第蓋舊  
本也後人始以作者先後次第之爾或曰天聖中陳說  
之所為也

補注楚辭十七卷考異一卷

未詳撰人凡王逸章句有未盡者補之自序云以歐陽  
永叔蘇子瞻晁文元宋景文家本叅校之遂為定本又

得姚廷輝本作考異且言辯騷非楚辭本書不當錄

重編楚辭十六卷

右族父吏部公重編獨離騷經仍故為首篇其後以遠游九章九歌天問卜居漁父大招九辯招魂惜誓七諫哀時命招隱九懷九歎為次而去九思一篇其說曰按八卷屈原遭憂所作故首篇曰離騷經後篇皆曰離騷餘皆曰楚辭今本所第篇或不次序於是遷遠游九章次離騷經在九歌上以原自序其意近離騷經也而九

歌天問乃原既放之後攄憤所作者故遷於下卜居漁父自序之餘意也故又次之大招古與疑原作非景差辭沈淵不返故以終焉為楚辭上八卷九辯招魂皆宋玉或曰九辯原作其聲浮矣惜誓弘深或以為賈誼作蓋近之東方朔嚴忌皆漢武帝廷臣淮南小山之辭不當先朔忌王褒漢宣帝時人後淮南小山至劉向最後作故其次序如此皆西漢以前文也為楚辭下八卷王逸東漢人九思視向以前所作相濶矣又十七卷非舊

錄故去之又頗刪逸離騷經訓釋淺陋者而錄司馬遷原傳冠其首云

續楚辭二十卷

右族父吏部公編擇後世文賦與楚辭類者編之自宋玉以下至本朝王令凡二十六人計六十篇各為小序以冠其首而最喜沈括以為辭近原蓋深探其用意疾徐其步驟而與之偕然亦暇而不迫也

變離騷二十卷

右族父吏部公編公既集續楚辭又擇其餘文賦或大意祖述離騷或一言似之者為一編其意謂原之作曰離騷餘皆曰楚辭今楚辭又變而迺始曰變離騷者欲後世知其出於原也猶服盡而系其姓於祖云所錄自楚荀卿至本朝王令凡三十八人通九十六首

別集類上

蔡邕集十卷

右漢蔡邕伯喈陳留圉人仕至左中郎將後為王允所

害邕博學好辭章術數天文妙操音律在東觀欲補漢紀自陳十意及付獄乞黥刑以成書不能得遂死獄中所著文章百四篇今錄止存九十篇而銘墓居其半或曰碑或曰銘或曰神誥或曰哀讚其實一也嘗自云為郭有道碑獨無愧辭則其他可知矣凡文集其人正史自有傳者止掇論其文學之辭及畧載鄉里所終爵位或死非其理亦附見餘歷官與其善惡率不錄若史逸其行事者則雜取他書詳載焉庶後有考

曹植集一卷

右魏曹植子建也太祖子文帝封植為陳王卒年四十一諡曰思年十餘歲誦讀詩論及辭賦數十萬言善屬文援筆立成自少至終篇籍不離於手景初中撰錄植所著賦頌詩銘雜論凡百餘篇今集僅二百篇通為一卷

王粲集八卷

右後漢王粲仲宣也高平人為魏國侍中粲博物多識

強記善屬文舉筆便成無所改定時人常以為宿製然  
正復精意覃思亦不能加著詩賦論議垂六十篇今集  
有八十一首按唐藝文志彙集十卷今亡兩卷其詩文  
反多於史所記二十餘篇不曉其故

阮籍集十卷

右魏阮籍嗣宗也尉氏人籍志氣宏放博覽羣籍尤好  
莊老屬文不留思嗜酒能嘯善彈琴當其得意忽忘形  
骸雖不拘禮教而發言玄遠晉帝輔政為從事中郎後

求為步兵校尉

嵇康集十卷

右魏嵇康叔夜謫國人康美詞氣有風儀土木形骸不自藻飾學不師授博覽該通長好莊老屬文玄遠以魏宗室婚拜中散大夫景元初鍾會譖於晉文帝遇害

張華集三卷

右晉張華茂先也范陽人惠帝時為司空趙王倫孫秀黨謀害之華學業優博辭藻溫麗圖緯方伎等書莫不

詳覽家有書三十乘天下竒秘悉在博物洽聞世無與  
比集有詩一百二十哀詞冊文二十一賦三

陸機集十卷

右晉陸機士衡也抗之子少有異才文章冠世伏膺儒  
術非禮不動吳滅退居舊里閉門勤學積有十年太康  
末入洛成都王穎令機率師伐長沙王乂至河橋大敗  
為穎所誅初造張華華重其名如舊相識嘗謂之曰人  
之為才常恨才少而子更患多葛洪著書亦稱歎焉所

著文章凡三百餘篇今存詩賦論議箋表碑誄一百七十餘首以晉書文選較正外餘多舛誤

陸雲集十卷

右晉陸雲士龍也吳郡人惠帝時為中書侍郎會兄機兵敗同遇害雲六歲能屬文性清正有才理與兄齊名雖文章不及而持論過之所著文章三百四十九篇新書十篇

陶潛集十卷

右晉陶潛淵明也潯陽人晉宋史皆有傳晉安帝時為彭澤令去職潛少有高趣好讀書不求甚解著五柳先生傳以自况世號靖節先生今集有數本七卷者梁蕭統編以序傳顏延之誄載卷首十卷者北齊陽休之編以五孝傳聖賢羣輔錄序傳誄分三卷益之詩篇次差異按隋經籍志潛集九卷又云梁有五卷錄一卷唐藝文志潛集五卷今本皆不與二志同獨吳氏西齋書目有潛集十卷疑即休之本也休之本出宋庠家云江左

舊書其次第最有倫貫獨四八目後八儒三墨二條似  
後人妄加

鮑照集十卷

右宋鮑照明遠也上黨人世祖以為中書舍人後臨海  
王子頊鎮荊州照為參軍子頊敗為亂兵所殺初孝武  
好文自謂人莫能及故照悟其旨為文多鄙言累句當  
時謂照才盡實不然也事見沈約書而李延壽史乃以  
世祖為文帝集有唐虞炎序云為宋景所害儻見於他

書乎唐人避武后諱改照為昭

謝朓集十卷

右齊謝朓玄暉也陽夏人明帝初自中書郎出為東海太守東昏時為江祐黨譖害之朓少好學有美名文章清麗善草隸尤長五言詩沈約嘗云二百年來無此詩也文選所錄朓詩僅二十首集中多不載今附入

謝惠連集五卷

右宋謝惠連也方明子元嘉七年為彭城王法曹行參

軍十歲能屬文為雪賦以高麗見竒族兄靈運每見其  
新文曰張華重生不能易也

吳均集三卷

右梁吳均叔宰也史稱均博學才俊體清拔有古氣好  
事效之謂吳均體有集二十卷唐世搜求止得十卷文  
亡其七矣舊題誤曰吳筠筠乃唐人此詩殊不類而其  
中有贈周興嗣柳貞陽輩詩固已知其非筠又有蕭子  
雲贈吳朝請入東詩蓋在武帝時為奉朝請則知為均

也無疑矣蕭子雲詩八蕭子顯朱异平均王僧孺詩各  
一附顏之推譏均集中有破鏡賦今亦亡之

江淹集十卷

右梁江淹文通也濟陽人梁初為散騎常侍封醴陵侯  
少好學不事章句留情於文章晚節才思微退人謂才  
盡著述百餘篇自撰為前後集今集二百四十九篇

何遜集二卷

右梁何遜仲言也東海人終水部員外郎遜少能詩州

舉秀才范雲見其文嗟賞曰觀文人質則過懦麗則傷俗能含清濁古今見之何生矣沈約謂每讀卿詩一日三復猶不能已與劉孝綽以文章見重於世謂之何劉王僧孺集其文為八卷今亡逸不全

庾信集二十卷

右周庾信子山也南陽人梁元帝時為散騎常侍聘西魏遂留長安孝閔時終司憲大夫信在梁與徐陵文並綺麗世號徐庾體集有滕王迥序

王績東臯子五卷

右唐王績無功也龍門人隋大業中舉孝悌廉潔授六合丞棄官耕東臯自號東臯子唐書以為隱逸集有呂才序稱其幼岐嶷年十五謁楊素占對英辯一坐盡傾以為神仙童子薛道衡見其登龍門憶禹賦歎曰今之庾信也且載其卜筮之驗者數事云

楊炯盈川集二十卷

右唐楊炯也華陰人顯慶六年舉神童授校書郎終婺

州盈川令卒炯博學善屬文與王勃盧照隣駱賓王以  
文詞齊名海內稱王楊盧駱四才子亦曰四傑炯自謂  
吾愧在盧前恥居王後張說曰盈川文如懸河酌之不  
竭恥王後信然愧盧前謙也集本三十卷今多亡逸

王勃集二十卷

右唐王勃子安也通之孫麟德初劉祥道薦其材對策  
高等授朝散郎沛王召署府修撰以戲為諸王作鬪雞  
檄高宗怒斥出府父為交趾令勃往省溺海卒勃屬文

初不精思先磨墨數升酌飲引被覆面臥及寤援筆成篇不易一字時人謂之腹藁有劉元濟序

盧照隣幽憂子集十卷

右唐盧照隣昇之也范陽人調新都尉病去官隱具茨山下手足攣廢疾久訣親戚自沈潁水照隣自以當高宗時尚吏已獨儒武后尚法已獨黃老后封嵩山聘賢士已已廢著五悲文今在集中嘗自號幽憂子

駱賓王集十卷

右唐駱賓王也義烏人武后時數言事得罪貶臨海丞  
不得志棄官去文明中徐敬業亂署府佐為敬業傳檄  
天下斥武后罪后讀之矍然及敗亡不知所之後宋之  
問逢之於靈隱寺已祝髮為浮屠矣賓王七歲能屬文  
妙於五言詩中宗詔求其文得百餘篇命郝雲卿次序  
之

蘇頲許公集二十卷

右唐蘇頲廷碩也武功人調露二年進士賢良方正異

等除左司率府胄曹玄宗時中書舍人知制誥開元四  
年同紫微黃門平章事頴幼敏悟一覽五千言輒覆景  
龍後與張說以文章顯時號燕許李德裕謂近世詔誥  
唯頴敘事外為文章韓休為序集本四十六卷今亡其  
半矣

陳子昂集十卷

右唐陳子昂伯玉也梓州人文明初舉進士上書召見  
累擢拾遺聖歷初解官歸養父喪廬墓縣令段簡貪暴

脅取其賂不厭逮捕死獄中子昂少以豪俠使氣及冠折節為學精究墳籍耽愛黃老易象尤善屬文唐興文章承徐庾餘風天下祖尚至是始變雅正故雖無風節而唐之名人無不推之柳儀曹曰張說以著述之餘攻比興而莫能極張九齡以比興之暇窮著述而不克備唐興以來稱是選而不作者子昂而已

宋之問考功集十卷

右唐宋之問延清也汾州人武后召與楊炯分直習藝

館諂事太平公主為考功員外郎睿宗初貶欽州賜死  
自魏建安迄江左詩律屢變至沈約庾信以音韻相婉  
附屬對精密及之問沈佺期又加靡麗回忌聲病約句  
準篇如錦繡成文學者宗之號曰沈宋徐堅嘗論之問  
之文如良金美玉無施不可其為當時所重如此

沈佺期集五卷

右唐沈佺期雲卿也相州人及進士第由協律郎遷弘  
文館直學士常侍中宗宴舞回波為弄辭以悅帝還賜

牙緋

杜審言集一卷

右唐杜審言必簡也襄陽人預之後裔擢進士恃高才以傲世嘗對武后賦歡喜詩后歎重其文學李嶠崔融蘇味道為文章四友集有詩四十餘篇而已

張說集三十卷

右唐張說道濟也洛陽人永昌元年賢良方正策第一累遷鳳閣舍人睿宗時兵部侍郎平章事開元十八年

終左丞相燕國公說為文精壯長於碑志朝廷大述作  
多出其手嘗典集賢圖書之任間為天平軍大使及致  
仕一歲皆即軍中於家論譔國史晚謫岳州詩益悽惋  
人謂得江山助

李嶠集一卷

右唐李嶠巨山也贊皇人擢進士第制策甲科為監察  
御史武后時同鳳閣鸞臺平章事嶠富才思前與王勃  
楊炯中與崔融味道齊名晚諸人沒為文章宿老學

者取法集本六十卷未見今所錄一百二十詠而已或  
題曰單題詩有張方注

張九齡曲江集二十卷

右唐張九齡子壽也曲江人長安二年進士調校書郎  
以道侔伊呂科策高等為左拾遺開元中為中書令卒  
諡文獻九齡風度蘊藉幼善屬文玄宗朝知制誥雅為  
帝知為相諤諤有大臣節及貶荊州惟文史自娛朝廷  
許其勝流徐堅論九齡之文如輕縑素練實濟時用而

寤邊幅柳宗元以九齡兼攻詩文但不能究其極耳集  
後有姚子彥所撰行狀呂溫撰真贊鄭宗珍撰諡議徐  
浩撰墓碑及贈司徒勅詞

王維集十卷

右唐王維摩詰也太原人開元九年進士終尚書右丞  
維幼能屬文工草隸善畫名盛安祿山反嘗陷賊中賊  
大宴凝碧池賦詩痛悼詩聞行在後得免死代宗訪維  
文章於弟縉哀集十卷上之李肇記維漠漠水田飛白

鷺陰陰夏木轉黃鸝之句以為竊李嘉祐者今嘉祐之  
集無之豈肇之厚誣乎

儲光羲集五卷

右唐儲光羲魯人開元十四年進士嘗為監察御史後  
從安祿山偽署賊平貶死

王昌齡詩六卷

右唐王昌齡少伯也江寧人開元十五年進士為秘書  
郎又中宏詞不護細行貶龍標尉以世亂歸鄉里為刺

史閻丘曉所殺昌齡工詩鎮密而思清時謂王江寧云

常建詩一卷

右唐常建開元十五年進士

劉長卿集十卷

右唐劉長卿字文房開元二十一年進士至德中監察御史以檢校祠部員外為轉運判官知淮西岳鄂轉運使留後觀察使吳仲孺誣奏貶潘州南巴尉會有為辨之者除睦州司馬終隨州刺史長卿剛而犯上故兩逢

斥廢詩雖窘於才而能鍛鍊權德輿嘗謂為五言長城  
今集詩九卷雜文一卷

顏真卿文一卷

右唐顏真卿清臣也萬年人博學工辭章開元二十二  
年進士又登制科代宗時為太子太師使李希烈遇害  
世謂真卿忤楊國忠李輔國元載楊炎盧杞拒安祿山  
李希烈廢斥者七八以至於死而不自悔天下一人而  
已而學問文章往往雜神仙浮屠之說不皆合於理而

所為乃爾者蓋天性然也

蕭穎士集十卷

右唐蕭穎士茂挺也梁宗室之後開元二十三年進士為史館待制安祿山反竄山南節度崔圓授揚州工曹至官信宿而去客死汝南逆旅門人諡曰文元先生穎士屬文觀書一覽即誦通百家譜系書籀嘗教授濮陽時號蕭夫子李林甫惡不附已故數罷去閩士和盛推穎士文章以為聞蕭氏之風者童子羞稱曹陸

張鷟龍筋鳳髓判十卷

右唐張鷟字文成辭章藻麗嘗入中制科此乃其書判也凡一百首自號浮休子

孟浩然詩一卷

右唐孟浩然也襄陽人工五言詩隱鹿門山年四十乃游京師一日諸名士集秘省聯句浩然句曰微雲淡河漢疎雨滴梧桐衆皆欽伏張九齡王維雅稱之維私邀入禁林遇玄宗臨幸浩然匿牀下維以聞上曰素聞其

人因召見命自誦所為詩至不才明主棄之句上曰不求進而誣朕棄人命放歸所著詩二百一十首宜城處士王士源序次為三卷今併為一又有天寶中韋縚序嚴從中黃子集三卷

右唐嚴從開元中為著作郎春宮侍讀集賢院學士卒自號中黃子當時命太子侍文呂向訪遺文於家得訓老經頌等八篇序為三卷

李翰林集二十卷

右唐李白太白也白舊集十卷唐李陽冰序咸平中樂史別得白歌詩十卷凡歌詩七百七十六篇又纂雜著為別集十卷宋次道治平中得王文獻及唐魏萬所纂白詩又裒唐類詩洎刻石所傳者通李陽冰樂史集共一千一篇雜著六十五篇曾子固乃考其先後而次第之云白蜀郡人天寶初至長安明皇召為翰林供奉頃之不合去安祿山反明皇在蜀永王璘節度東南白時卧廬山迫致之璘敗坐繫尋陽獄崔渙宋若思驗治白

以為罪薄釋白囚使謀其軍乾元元年終以汙璘事長  
流夜郎以赦得釋過當塗以卒其始終更涉如此此白  
之詩書所自序可考者也舊史稱白山東人為翰林待  
詔又稱白在宣城謁見永王璘遂辟為從事而新書又  
稱白流夜郎還潯陽坐事下獄宋若思釋之者皆不合  
於白之自序蓋史誤也予按杜甫詩亦以白為山東人  
而蘇子瞻嘗恨白集為庸俗所亂則白之自序亦未可  
盡信而以為史誤近蜀本又附入左縣邑人所哀曰白

隱處少年所作六十篇尤為淺俗白天才英麗其辭逸蕩雋偉飄然有超世之心非常人所及讀者自可別其真偽也

岑參集十卷

右唐岑參南陽人文本之後天寶三年進士累官補闕起居郎出嘉州刺史杜鴻漸表置幕府為職方郎中兼侍御史罷終於蜀參博覽史籍尤工綴文屬詞清尚用心良苦其有所得往往超拔孤秀度越常情每篇絕筆

人競傳諷至德中裴越薦杜甫等嘗薦其識度清遠議  
論雅正佳名早立時輩所仰可以備獻替之官云集有  
杜確序

李嘉祐詩二卷

右唐李嘉祐別名從一趙州人天寶七年進士為秘書  
正字袁台二州刺史善為詩綺靡婉麗有齊梁之風時  
人以比吳均何遜云

高適集十卷集外文二卷別詩一卷

右唐高適達夫也又字仲武渤海人天寶八年舉有道科中第永泰中終散騎常侍五十始為詩即工以氣質自高每一篇出好事者輒傳布云

賈至集十卷

右唐賈至幼幾也洛陽人天寶十年以明經擢第累官起居舍人知制誥從幸西川當讓傳位冊既進藁上曰先天誥命乃父為之今茲冊命爾又為之兩朝大典出卿父子可謂繼美矣大歷中終散騎常侍集李邕鄆淑

家本二十卷蘇弁編次常仲儒為序以墓銘序碑列於後今亡其半矣蘇子瞻嘗行呂惠卿責詞有元兇在位之語仇人乃曰史唯宋太子劬謂之元兇因誣其指斥殊不知曹子建責躬詩有曰元兇是率蓋自謂也今至制誥中除魏仲犀徐歸道詞亦以元兇指祿山豈獨劬為元兇耶世多疑子瞻失詞因表出之

錢起詩二卷

右唐錢起徵之父也吳郡人天寶中舉進士初從鄉薦

客舍月夜聞人哦於庭曰曲終人不見江上數峰青起  
攝衣從之無所見矣及就試詩題乃湘靈鼓瑟也起即  
以鬼謠十字為落句主文李暉深嘉之擢置高第釋褐  
授校書郎終考功與郎士元齊名時曰前有沈宋後有  
錢郎

元子十卷琦玕子一卷文編十卷

右唐元結次山也後魏之裔天寶十三年進士復舉制  
科授右金吾兵曹累遷容管經畧使始在商餘山稱元

子逃難入琦玕洞稱琦玕子或稱浪士漁者稱為聾叟  
酒徒呼漫叟及官呼漫郎因以命其所著結性耿介有  
憂道閔世之意逢天寶之亂或隱自謂與聾牙豈獨其  
行事而然其文詞亦如之然其辭義幽約譬古鐘磬不  
諧於俚耳而可尋玩在當時名出蕭李下至韓愈稱數  
唐之文人獨及結云

韓翃詩五卷

右韓翃君平也南陽人天寶十三年進士淄青侯希逸

宣武李勉繼辟幕府俄以駕部郎中知制誥終於中書  
舍人翊詩興致繁富朝野重之

杜甫集二十卷集外詩一卷注杜甫詩二十卷

蔡興宗編杜甫詩二十卷趙次公注杜甫詩五  
十九卷

右唐杜甫子美也審言之孫天寶十三年玄宗朝獻太  
清宮享廟及郊奏賦三篇使待制集賢院宰相試文再  
遷右衛率府胄曹終於劍南叅謀檢校工部員外曠放

不自檢好論天下大事高而不切少與李白齊名時號  
李杜數當寇亂挺節無污為歌詩傷時撓弱情不忘君  
人憐其忠云集有王洙原叔王琪君玉序本朝自王原  
叔以後學者喜杜詩世有為之注者數家率皆鄙淺可  
笑有托原叔名者其實非也呂微仲在成都嘗譜其年  
月近時有蔡興宗者再用年月編次之而趙次公者又  
以古律詩雜次第之且為之注兩人頗以意改定其誤  
字人不善之

獨孤及毗陵集二十卷

右唐獨孤及至之也洛陽人天寶十三年舉洞曉玄經科代宗初為太常博士濠舒二州刺史政最徙常州卒官自幼有成人之量徧覽五經觀其大義不為章句學為文以立憲誠世褒賢過惡為用長於論議唐實錄稱韓愈師其為文云集有李丹梁肅前後序末載崔祐甫

碑誌

皇甫冉詩二卷

右唐皇甫丹茂政也丹陽人天寶十五年進士為無錫尉歷拾遺補闕卒與弟曾齊名當時比張氏景陽孟陽云集有獨孤及序

郎士元詩

右唐郎士元字君胄中山人天寶十五年進士為郢州刺史與錢起俱有詩名而士元尤更清雅時朝廷公卿出牧奉使若兩人無詩祖行人以為愧

顧況集二十卷

右唐顧况字逋公蘇州人至德二年江東進士善為歌  
詩性詼諧德宗時柳渾輔政以秘書郎召况素善李泌  
及泌相自謂當得達官久遷著作郎及泌卒有調笑語  
貶饒州司戶卒集有皇甫冉詩序

陳蛻詩一卷

右唐陳蛻集有長安十五詠自序云蛻生長江淮間以  
詩句從賦僅十餘年矣今我后撫運澤及四夷蛻復得  
為太平人也云云蓋肅代間人也

盧綸詩一卷

右唐盧綸與吉中孚韓翃錢起司空曙苗發崔峒耿漳  
夏侯審李端皆能詩齊名號大歷十才子綸字允言累  
舉進士不第

耿漳詩二卷

右唐耿漳寶應元年進士為左拾遺

韋應物集十卷

右唐韋應物京兆人天寶時為三衛周道遙公翼之後

左僕射扶陽公待賈生令儀令儀生鑿鑿生應物永泰  
中任洛陽丞京兆府功曹大歷十四年自鄆縣制除機  
陽令稱疾辭歸建中二年授比部郎中守滁州居頃之  
改江州召還擢左司郎中或媚其進媒藥之出為蘇州  
刺史性高潔鮮食寡欲所居焚香除地而坐詩律自沈  
宋以後日益靡漫鏤章刻句揣合浮切音韻諧婉屬對  
麗密而嫺雅平淡之氣不在矣獨應物之詩馳驟建安  
以還得其風格云

李端司馬集三卷

右唐李端趙州人大歷五年進士為校書郎卒官杭州  
司馬郭曖尚昇平公主賢明招納士類故端等多從曖  
游嘗進官宴客端席上賦詩甚工一坐稱歎錢起曰素  
為之請賦起姓端立獻一章云新開金埒看調馬舊錫  
銅山許鑄錢起乃服主喜厚賜帛

李益詩一卷

右唐李益君虞也姑臧人大歷四年進士調鄭縣尉幽

州劉濟辟從事憲宗雅聞其名召為集賢殿學士負才  
凌籍士衆不能堪暴其獻濟詩不上望京樓之句以涉  
怨望詔降秩俄復舊益少富詞藻長於歌詩與宗人賀  
齊名每作一篇樂工以賂求取被聲歌供奉天子征人  
早行篇天下皆施之圖繪今集有從軍詩五十篇而無  
此詩惜其放逸多矣

陸贄奏議十二卷

右唐陸贄敬輿也贄嘉興人大歷八年進士中博學宏詞

書判拔萃科德宗初為翰林學士從奉天還為中書舍人平章事贄在奉天日下詔書數百初如不經思逮成皆周盡人情嘗為帝言今盜徧天下宜痛自悔以感人誠不吝改過以言謝天下使臣持筆無所忌庶叛者董心上從之故下制書雖武夫悍卒無不感動流涕議者謂興元戡難功雖爪牙宣力蓋贄有助焉舊有榜子集五卷議論集三卷翰苑集十卷元祐中蘇子瞻乞校正進呈改從今名疑是裒諸集成此書

王建詩十卷

右唐王建也大歷十年進士為昭應縣丞大和中陝州  
司馬尤長宮詞

柳郊詩一卷

右唐柳郊與李端盧綸輩相酬贈詩大歷間進士也

武元衡臨淮集二卷

右唐武元衡伯蒼也河南人建中四年進士元和三年  
以門下侍郎平章事出劍南節度八年復秉政明年早

朝遇盜害之元衡工五言詩好事者傳之被於管絃嘗  
夏夜作詩曰夜久喧暫息池臺唯月明無因駐清景日  
出事還生翌日遇害舊有臨淮集七卷此其二也議者  
謂唐世工詩宦達者惟高適宦達詩工者惟元衡

羊士諤詩一卷

右唐羊士諤也貞元元年擢進士第順宗時為宣歙巡  
官王叔文所惡貶汀州寧化尉元和初李吉甫知獎擢  
監察御史掌制誥出為資州刺史

魏信陵集一卷

右唐魏信陵貞元元年進士為舒州望江令卒

楊巨源詩一卷

右唐楊巨源字景山河中人貞元五年第進士為張弘靖從事自秘書郎擢太常博士遷禮部員外郎出為鳳翔少尹復召除國子司業巨源在元和中詩韻不造新語體律務實用功頗深旦暮搖首微詠不輟年老成疾嘗贈弘靖詩敘其家世云伊陟無聞祖韋賢不到孫時

人稱之年滿七十丐歸時宰惜其去以為其鄉少尹不絕其祿太和以官壽卒

歐陽詹集十卷

右唐歐陽詹行周也泉州人貞元八年進士終國子四門助教初閩人不肯北宦及常袞為觀察使興學勸士舉進士自詹始與韓愈李觀李絳聯第皆天下選時號龍虎榜云此集福州刺史李貽孫纂

韓愈集四十卷集外文一卷

右唐韓愈退之也南陽人貞元八年進士累擢知制誥  
進中書舍人遷吏部侍郎為京兆尹與李紳不協紳出  
愈罷為兵部俄復舊劉昫唐書稱愈恃才肆意盪孔孟  
之旨若南人妄以柳宗元為羅池神而愈碑以實之李  
賀父名晉肅不應進士而愈作諱辨又為毛穎傳譏戲  
不近人情此文章之甚紕繆者新書稱愈三歲而孤自  
知讀書比長盡通六經百家學性明銳不詭隨每言文  
章自相如子長後作者不世出故深探本原卓然樹立

成一家言造端置辭要為不襲蹈前人者議者謂舊史謂愈文章甚紕繆固不待辨而新史謂造端置辭不蹈襲前人亦未為知愈蓋愈之置辭字字悉有據依其造端如毛穎傳進學解之類皆有所師範云其集屢經名人是正其訛舛絕少但編次殊失倫類有暇日者再宜編之

李絳論諫集七卷

右唐李絳深之也贊皇人貞元八年進士中宏詞補渭

南尉六年進中書侍郎平章事太和初為山南西道節度南蠻入寇為亂兵所害絳偉儀質以直道進退望冠一時賢不肖大分屢為讒邪所中平生論諫數十百事其甥夏侯孜所編大中史官蔣偕為序

李觀文編三卷外集二卷

右唐李觀元賓也華之從子貞元八年進士中宏詞科終太子校書郎觀為文不襲前人時謂與韓愈相上下議者以觀文未及愈老不休故擅名陸希聲大順中編

觀文為之序以為觀尚辭故辭勝理愈尚質故理勝辭  
雖愈窮老終不能加觀之辭觀後愈死亦不能逮愈之  
質云其後蜀人趙昂又得其安邊書至晁錯論一十四  
首為後集二卷頃年從父詹事公掌誥命以四之日為  
四日不學者闕然以為非今觀集中亦嘗如此用乃知  
本於此

柳宗元集三十卷集外文一卷

右唐柳宗元子厚也後魏濟陰公某之裔貞元九年進

士中博學宏詞科授校書郎終於柳州刺史宗元少精  
敏絕倫文章卓偉精緻既竄斥堙厄感鬱一寓諸文傲  
離騷數十篇讀者悲惻在柳州進士走數千里從學經  
指授者文辭皆有法世號柳柳州韓愈評其文曰雄深  
雅健似司馬子長崔蔡不足多云集中有御史周君碣  
司馬溫公考異以此碣為周子諒碣實開元二十五年  
也柳作天寶時悞按此碣殊疎畧舊唐書紀牛仙客傳  
玄宗實錄皆載子諒彈牛仙客杖流瀛州死藍田

劉禹錫夢得集三十卷外集十卷

右唐劉禹錫夢得也中山人貞元九年進士登博學宏詞科貶朗州司馬元和十年召還欲任以南省郎作立都觀看花詩譏忿當路出為播州刺史裴度以母老為請得易連州入為主客郎中復作游立都詩以詆權近俄分司東都遷賓客會昌時加檢校禮部尚書卒禹錫少工文章恃才而廢老年寡所合乃以文章自適素善詩晚節尤精白居易推為詩豪嘗言其詩在處應有神

物護持禹錫早與柳宗元為文章之友稱劉柳晚與居易為詩友號劉白雖詩文似少不及然能抗衡二人間信天下之奇才也

孟東野詩集十卷

右唐孟郊東野也湖州人貞元十二年進士調溧陽尉辟為興元叅謀卒郊少隱嵩山性介寡合韓愈一見為忘形交為詩有理致然思苦澁李觀論其詩曰高處在古無上平處下顧二謝云張籍論為貞曜先生集宋次

道重編先時世傳汴吳鏤本五卷一百二十四篇周安  
惠本十卷三百三十一篇別本五卷三百四十篇蜀人  
蹇濬用退之贈郊句纂咸池集二卷一百八十篇自餘  
不為編帙雜錄之家家自異次道總拾遺逸摘去重複  
若體製不類者得五百十一篇而十聯句不與馬一贊  
二書附於後郊集於是始有完書

呂溫集十卷

右唐呂溫和叔也一数字化光河中人貞元十四年進士

以善韋執誼王叔文起家再命左拾遺同張薦使吐蕃  
元和初使還累進知御史雜事再貶道州刺史徙衡州  
溫從梁肅為文章規摹左氏藻瞻精富流輩推尚劉禹  
錫為編次其文序之云古之為書先立言而後體物賈  
生之書首過秦而荀卿亦後其賦故斷自人文化成論  
至諸葛武侯廟記為上篇今集先賦詩後雜文非禹錫  
本也

李翱集十八卷

右唐李翱習之涼武昭王之後貞元十四年進士調校書郎知制誥會昌初終山南東道節度使翱性峭鯁論議無所屈仕不得顯官怫鬱無所發從韓愈為文辭致渾厚見推當時集皆雜文無歌詩前有蘇舜欽序云唐之文章稱韓柳翱文雖辭不迨韓而理過於柳

張籍詩集五卷

右唐張籍文昌也和州人貞元十五年登進士第終國子司業籍性狷急惟長於樂府多警句元和中與白樂

天孟東野歌辭天下宗之謂之元和體云集張洎編

文心雕龍

右晉劉勰撰評自古文章得失別其體制凡五十篇各係之以贊云余嘗題其後曰世之詞人刻意文藻讀書多滅裂杜牧之以龍星為真龍王摩詰以去病為衛青昔人譏之然亦不足怪蓋詩賦或率爾之作故也今勰著書垂世自謂嘗夢執丹漆器隨仲尼南行其自負不淺矣觀其論說篇籍稱論語以前經無論字六韜三論

後人追題是殊不知書有論道經邦之言也其疎畧殆過於王杜矣



郡齋讀書志卷四上

欽定四庫全書

郡齋讀書志卷四中

宋 晁公武 撰

別集類中

白居易長慶集七十一卷

右唐白居易樂天太原人貞元十七年進士中拔萃科  
元和初制策一等調盪屋尉入翰林為學士太和中遷  
刑部侍郎會昌初以刑部尚書致仕居易以文章精切

然最工詩初頗以規諷得失及其多更下偁俗好當時  
士人爭傳雞林國賈相率篇易一金在杭州自類詩藁  
分諷諭閒適感傷雜律四類前集五十卷有元稹序後  
集二十卷自為序紀又有續後集五卷今亡三卷矣子  
嘗謂樂天進退以義風流高矣與劉禹錫游人謂之劉  
白而不陷人司馬黨中與元稹游人謂之元白而不蹈  
北司黨中又與楊虞卿為姻家而不陷牛李黨中嗚呼  
叔世有如斯人之髣髴者乎獨集後載聞李崖州貶二

絕句其言淺俗似幸其禍敗者余固疑非樂天之語及以唐史攷之崖州貶時樂天沒將踰年或曰浮屠某作也

戴叔倫述藁十卷外詩一卷書狀一卷

右唐戴叔倫幼公也潤州人為人溫雅善舉止貞元十六年進士累遷容管經畧使政治稱最德宗賜中和詩世以為榮代還請為道士未幾卒集有馬總序或題會錄云唐史但云師事蕭穎士初不稱其能詩以時人少

金定世身全言  
其詩骨氣繚弱故也

權德輿集五卷

右唐權德輿載之也秦州人未冠以文章稱諸儒間貞  
元十五年知制誥累官中書舍人元和五年以禮部尚  
書平章事德輿三歲知變四聲四歲能賦詩積思經術  
無不貫綜自始學至老未曾一日去書其文雅正瞻緜  
當時公卿功德卓異者皆所銘紀雖動止無外飾其醜  
藉風流自然可慕貞元元和間為縉紳羽儀其兩漢辨

亡論世祖封不義侯議世多稱之云嘗自纂制誥集五十卷楊憑為序今亡逸文集孫憲孫編次楊嗣復為序

符載集十四卷

右唐符載字厚之岐襄人幼有宏達之志隱居廬山聚書萬卷不為章句學貞元中李吳江西觀察薦其材授奉禮郎為南昌軍副使繼辟西川韋臯掌書記澤潞都士美參謀歷協律郎監察御史元和中卒段文昌為墓志附於後集皆雜文未篇有數詩而已集前有崔郡王

金史 卷之八  
卷四  
湘送符處士歸覲序皆云載蜀人以比司馬王揚云

張登集六卷

右唐張登性剛潔介特始以中褐就辟歷衛佐廷尉平  
監察御史貞元中改河南士曹掾遷殿中侍御史漳州  
刺史居七年坐公累受劾史議侵誣感疾卒權德輿為  
之序甚詳以公幹景陽比之國史補亦稱登長於小賦  
氣宏而密間不容髮有織成隱起結綵賦金之狀其舊  
集詩賦之外書啓序述誌記銘誄合一百二十二篇今

存者纔六十餘首

戎昱集二卷

右唐戎昱撰初李壹廉察桂林月夜聞隣居吟咏之音  
清暢遂明訪之乃昱也即延為幕賓後因飲席調其侍  
兒壹微知其意即贈之昱感作賦詩有恩合死前酬之  
句又為衛伯玉荆南從事後歷長虔二州刺史

元稹長慶集六十卷

右唐元稹微之也河南人擢明經書判入等授校書郎

元和初舉制科對策第一拜左拾遺在江陵與監軍崔  
潭峻善潭峻以撰歌詩奏御穆宗賞悅即以祠部郎中  
知制誥未幾入翰林為中書舍人承旨學士長慶二年  
拜同中書門下平章事鎮為文長於詩與白居易齊名  
號元和體往往播樂府穆宗在東宮妃嬪近習誦之宮  
中呼元才子及知制誥變詔書體務純厚明切盛傳一  
時有長慶集百卷今亡其四十卷

皇甫湜文六卷

右唐皇甫湜持正也睦州人元和元年進士仕至工部  
郎中裴度辟東都判官度修福先寺求碑文於白居易  
湜怒曰近舍湜而遠取居易請從此辭度謝之湜即酣  
飲援筆立就度贈車馬繒綵甚厚湜怒曰吾自為顧况  
集序未嘗許人今碑字三千一字三縑何過我薄耶度  
笑曰不羈之才也從而酬之今集雜文三十八篇而已  
况集序在焉而碑已亡矣

李紳追昔遊三卷

右唐李紳公垂也潤州人元和元年進士補國子助教  
穆宗召為翰林學士累進中書舍人武宗即位拜中書  
侍郎平章事紳為人短小精悍於詩最有名號短李與  
李德裕元稹同時號三俊追昔遊者蓋賦詩紀其平生  
所遊歷謂起梁漢歸諫署升翰苑及播越荆楚逾嶺嶠  
止高安移九江過鍾陵守滁陽轉壽春留洛陽廉會稽  
分務東周守蜀鎮梁也開成戊午八月自為之序

鮑溶詩一卷

右唐鮑溶德源元和四年進士張薦謂溶詩氣力宏瞻博識清度雅正高古衆才無不備具云

朱傲詩一卷

傲字長通襄陽人隱居剡溪嗣曹王臯鎮江西辟節度叅謀貞元初召為拾遺不就

沈亞之集八卷

右唐沈亞之字下賢長安人元和十年進士涇原李彙辟掌書記為秘書省正字長慶初補櫟陽尉四年為福

建都團練副使事徐晦後累進殿中丞御史內供奉太  
和三年相耆宣慰德州取為判官耆罷亞之貶南康尉  
後終郢州掾亞之以文詞得名狂躁貪冒輔耆為惡故  
及於貶常遊韓愈門李賀杜牧李商隱俱有擬沈下賢  
詩亦當時名輩所稱許云

姚合詩十卷

右唐姚合也崇曾孫以詩聞元和十一年李逢吉知舉  
進士歷武功主簿富平萬年尉寶應中監察殿中御史

戶部員外郎出金杭二州刺史為刑戶二部郎中諫議大夫給事中陝虢觀察使開成末終秘書監世號姚武功云

施肩吾西山集五卷

右唐施肩吾吳興人元和十五年進士以洪州西山十二真君羽化之地慕其真風高蹈於此輯其所著自為之序

李賀集四卷外集一卷

右唐李賀長吉也鄭王之孫七歲能辭章韓愈皇甫湜  
聞之過其家使賦詩援筆輒就自目曰高軒過二人大  
驚年二十七終協律郎賀辭尚奇詭為詩未始先立題  
所得皆警邁遠去筆墨畦逕當時無能効者樂府十數  
篇雲韶工合之絃管云或說賀既卒後為不相悅者盡  
取其所著投圓中以故世傳者不多外集予得之梁子  
美家姚鉉頗選載文粹中

盧仝詩一卷

右唐盧仝范陽人隱少室山號玉川子徵諫議不起韓愈為河南令愛其詩厚禮之嘗作月蝕詩以譏元和逆黨愈稱其工後死于甘露之禍

劉乂詩一卷

右唐劉乂也少嘗任俠殺人後更折節讀書善歌詩客韓愈門作冰柱雪車二詩出盧仝李賀右歸齊魯不知所終今集二十餘篇爾不載二詩

斷金集一卷

多身日居人言 卷四中

右唐李逢吉令狐楚自未第至貴顯所唱和詩也後逢吉卒楚編次之得六十餘篇裴夷直名曰斷金集為之序

杜牧樊川集二十卷外集一卷

右唐杜牧牧之也京兆人太和二年進士復舉制科會昌中以考功郎中知制誥終中書舍人牧善屬文剛直有奇節敢論引大事指陳利病為詩情致豪邁人號小杜以別甫云臨死自為墓誌悉焚所為文章其甥裴廷

翰輯其業編次為之後序樊川蓋杜氏所居外集皆詩也

許渾丁卯集二卷

右唐許渾字用晦圉師之後太和六年進士為當塗太平二令以病免超潤州司馬大中三年為監察御史歷虞部員外睦郢二州刺史嘗分司於朱方丁卯間自編所著因以為名賀鑄本跋云按渾自序集三卷五百篇世傳本兩卷三百餘篇求訪二十年得沈氏曾氏本并

金少玉 卷之三十一  
朱四中  
取擬玄天竺集校正之共得四百五十四篇予近得渾  
集完本五百篇皆在然止兩卷唐藝文志亦言渾集兩  
卷鑄稱三卷者誤也

雍陶詩五卷

右唐雍陶國鈞太和八年進士大中六年自國子毛詩  
博士出刺簡州唐志集十卷今亡其半

李商隱樊南甲集二十卷乙集二十卷又文集

八卷

右唐李商隱義山也隴西人開成二年進士令狐楚奏  
為集賢校理楚出汴滑與元皆表幕府補太學博士初  
為文瑰邁奇古及從楚學儷偶長短而繁縟過之旨能  
感人人謂其橫絕前後無儔者今樊南甲乙集皆四六  
自為序即所謂繁縟者又有古賦及文共三卷辭旨怪  
詭宋景文序傳中云譎怪則李商隱蓋以此詩五卷清  
新纖艷故舊史稱其與溫庭筠段成式齊名時號三十  
六體云

李德裕會昌一品集二十卷姑臧集五卷平泉詩一卷窮愁志三卷別集八卷別友賦一卷

右唐李德裕文饒也趙郡人宰相吉甫之子少力于學既冠卓犖有大節不喜與諸生試有司憲宗時以蔭補校書郎穆宗初擢翰林學士號令大典皆出于手進中書舍人召兵部尚書中書門下平章事會昌初復秉政平澤潞策功拜太尉封衛公大中貶崖州司戶叅軍三年卒德裕性孤峭明辨有風采善為文章雖在大位手

不去書謀議援古袞袞可喜為武宗知常以經綸天下  
為已任時王室幾中興焉一品集鄭亞為之序皆會昌  
制誥表狀外內冊贊碑序文也賦詩四首窮愁志乃崖  
州所撰姑臧集題段全緯纂上四卷亦制誥第五乃戛  
點斯朝貢傳與八詩別集乃袞合古賦平泉詩集外雜  
著又有古賦一卷載金松等四賦

劉得仁詩集一秩一卷

右唐劉得仁公主之子長慶中以詩名五言清瑩獨步

文場自開成後昆弟皆居顯仕獨自苦於詩舉進士二  
十年竟無所成嘗有寄所知詩云外族帝王足中朝親  
故稀翻令浮議者不許九霄飛及卒詩僧棲白以絕句  
弔之曰忍苦為詩身到此冰魂雪魄已難招直教桂子  
落墳上生得一枝寬始銷

劉綺莊歌詩四卷

右唐四庫書目有綺莊集十卷今所餘止四卷詩三十  
二啟狀四十四而已惜其散落大半其本乃南唐故物

紙墨甚精後題曰昇平四年重題印其文云云

薛逢歌詩二卷

右故唐薛逢陶臣也河東人會昌元年進士終秘書監  
逢持論鯁切以謀畧高自標顯與楊收王鐸同年登第  
而逢文藝最優收作相逢有詩云誰知金印朝天客同  
是沙堤避路人鐸作相逢又有詩云昨日鴻毛萬鈞重  
今朝山岳一毫輕二人皆怒故不見齒

鄭畋集五卷

右唐鄭畋台文也滎陽人會昌二年進士書判八等授  
校書郎調渭南尉知制誥中書舍人乾符四年以本官  
同中書門下平章事二年召復秉政至成都以病不拜  
終太子少保藁草皆乾符堂判勅語云

趙嘏渭南詩三卷

右唐趙嘏承祐也會昌二年進士終渭南尉杜紫微讀  
其早秋詩云殘星幾點鴈橫塞長笛一聲人倚樓因謂  
之趙倚樓云

孟達詩一卷

右唐孟達字叔之平昌人會昌五年陳商下及第

薛能詩十卷

右唐薛能字大拙汾州人會昌六年登進士第大中末  
書判中選補鹽屋尉辟太原陝虢河陽從事李福鎮滑  
表署觀察判官歷御史都官刑部員外郎福徙西蜀奏  
以自副咸通中攝嘉州刺史造朝遷主客度支刑部郎  
中俄刺同州京兆尹溫璋貶命權知尹事出帥咸化入

授工部尚書復節度徐州徙忠武廣明元年徐軍戍澠  
水經許能以軍懷舊惠館之城中許軍懼見襲大將周  
皮乘衆疑怒逐能據城自稱留後因屠其家能政嚴察  
絕私謁癖於詩日賦一章晚節惑浮屠法奉之唯謹然  
恣驚俗傲佻輕以忤物及為藩鎮尤易武吏嘗命其子  
屬橐鞬雅拜新進士或問其故曰與渠銷弭灾咎云

李邕端公詩一卷

右唐李邕楚望也大中十年進士詩調清麗居餘杭疎

於馳競為藩鎮從事兼侍御史

鄭竭津陽門詩一卷

右唐鄭竭字賓先大中五年進士津陽即華清宮之外  
闕為詩百韻紀明皇時事自有序云

劉滄詩一卷

右唐劉滄字蘊靈大中八年進士詩頗清麗句法絕類  
趙嘏

孫樵經緯集三卷

右唐孫樵字隱之，大中九年進士。廣明初，狂寇犯闕，赴岐隴，授職方員外郎。時詔書曰：行在三絕，以常侍李膺、有曾閔之行，前進士司空圖有業，由之。風樵有揚馬之文，遂輯所著名經緯集。

李羣玉詩一卷

右唐李羣玉，文山也。澧州人，曠逸不樂仕進，專以吟詠自適。詩筆妍麗，才力適健，好吹笙弄筆翰，親友強赴舉。一上而止。裴休廉察湖南，延郡中。大中八年來京師，進

詩三百篇休復論薦授弘文館校書郎集後附其進詩  
表并除官制廣記所載黃陵廟事甚異絕句在焉

張祜詩一卷

右唐張祜承吉清河人樂高尚容淮南杜牧為度支使  
善其詩嘗贈之詩曰何人得似張公子千首詩輕萬戶  
侯嘗作淮詩有人生只合揚州死禪智山光好墓田之  
句大中中果終丹陽隱舍人以為讖云

陳陶集二卷

右唐陳陶嵩伯也鄱陽人大中時隱洪州西山自號三  
教布衣云江南野史有傳

溫庭筠金荃集七卷外集一卷

右唐溫庭筠也庭筠本名岐字飛卿宰相彥博之裔詩  
賦清麗與李商隱齊名時號溫李能逐絃吹之音為側  
艷之辭為行塵雜由是累年不第終國子助教宣宗嘗  
作詩賜官人句有金步搖遣場中對之庭筠對以玉跳  
脫上喜其敏欲用之而嘗作詩忤時相令狐綯終棄不

用

皮日休文數十卷

右唐皮日休字襲美一字逸少襄陽人隱鹿門山自號  
醉吟先生以文章自負尤善箴銘咸通八年登進士第  
為著作佐郎太常博士乾符喪亂東出關為毗陵副使  
陷巢賊中賊遣為讖文疑其讖已遂害之集乃咸通丙  
戌年居州里所編自序云發篋次類文藁繁如數澤因  
以名之凡二百篇

司空圖一鳴集三十卷

右唐司空圖表聖也河中人咸通十一年王凝下及第黃巢陷長安僖宗次鳳翔召拜知制誥中書舍人朱溫將篡召為禮部尚書不赴聞哀帝遇殺不食而卒圖居中條山自號知非子耐辱居士集自為序以濯纓亭一鳴牕名其集子荷別為集後記最長於詩其論詩有曰梅止於酸而鹽止於鹹其美常在酸鹹之外謂其詩慕聲花院靜幡影石壇高之句為得之人以其言為然

唐彥謙鹿門詩一卷

右唐唐彥謙茂業也并州人咸通末舉進士第中和王  
重榮表河中從事歷節度副使晉絳二州刺史重榮遇  
害貶漢中掾興元楊守亮留署判官遷副使閬壁刺史  
卒彥謙才高負氣無所推屈博學多藝尤能七言詩師  
溫庭筠故格體類之世稱耳聞明主捉三尺眼見愚民  
盜一杯蓋彥謙句也自號鹿門先生有薛廷珪序

曹唐詩一卷

右唐曹唐字堯賓桂州人初為道士咸通中為府從事  
卒作遊仙詩百餘篇或靳之曰堯賓嘗作鬼詩唐曰何  
也井底有天春寂寂人間無路月茫茫非鬼而何唐大  
笑今集中不見然他詩及神仙者尚多

秦韜玉投知小錄三卷

右唐秦韜玉中明京兆人有詞藻工歌吟險而好進為  
田令孜所善僖宗幸蜀令孜引為工部侍郎中和二年  
賜進士第編入春勝

雲臺編三卷宜陽外編一卷

右唐鄭谷字守愚宜陽人光啟三年擢高第遷右拾遺  
歷都官郎中乾寧四年歸宜春卒於別墅其集號雲臺  
編者以其扈從華山觀居所編次云谷詩屬思頗切於  
理而格韻凡猥語句浮俚不競不為議者所多然一時  
傳諷號鄭都官而弗名也

陸龜蒙笠澤叢書四卷

右唐陸龜蒙魯望也蘇州人少高放通六經大義尤明

春秋舉進士一不中從張搏為蘇湖從事居松江甫里以文章自怡自號江湖散人或號天隨子甫里先生笠澤者松江地名也其自序云自乾符六年春卧病笠澤遇體中不甚羸耗時亦隱凡著書詩賦銘記往往雜發不類不次混而錄之故曰叢書

韓偓詩二卷香奩集

右唐韓偓致光也京兆人龍紀元年進士累遷諫議大夫翰林學士昭宗幸鳳翔進兵部侍郎承旨朱全忠怒

貶濮州司馬榮懿尉天祐初挈族依王審知而卒香奩集一卷或曰和凝既貴惡其側艷故詭稱偓著云

李洞詩一卷

右唐李洞撰字才江諸王之孫慕賈島為詩銅鑄其像事之如神詩人多誦其僻澁不貴其奇峭唯吳融稱之昭宗時不第遊蜀卒

杜荀鶴唐風集十卷

右唐杜荀鶴池州人大順二年進士善為詞句切理宣

州田頌重之嘗以賤問至梁祖薦為翰林學士主客員外特勢侮易縉紳衆怒欲殺之而未及天祐初病卒有顧雲序荀鶴自號九華山人

程晏集六卷

右唐程晏字晏然乾寧二年進士集皆雜文

孫郇文纂一卷

右唐孫郇字希韓四明人乾寧四年進士好荀揚孟之書慕韓愈為校書郎河南府文學薦四十卷

朱抃致理書一卷

右唐朱抃襄陽人以三火舉為荆門令乾寧中方士許  
巖士得幸禁中言抃有經濟才帝幸石門召對即拜諫  
議大夫平章事

曹松詩一卷

右唐曹松夢徵也舒州人學賈島為詩天復元年與王  
希羽劉象柯崇鄭希顏同登第年皆七十餘號五老榜  
時以新平內難聞放進士喜特勅授校書郎而卒

裴說詩一卷

右唐裴說撰天祐三年進士詩有避亂一身多之句讀者悲之

羅虬比紅兒詩一卷

右唐羅虬也皇朝方性夫注虬詞藻富贍與其族人隱鄴齊名時號三羅從鄜州李孝恭籍中有杜紅兒者善歌常為副戎屬意副戎聘隣道虬請紅兒歌贈孝恭不令受之虬怒拂衣而起詰旦手刃之既而追其寃作

絕句詩百篇借古人以比其艷盛行於時

方干詩集一卷

右唐方干字雄飛歙人唐末舉進士不第隱鏡湖上徐  
凝有詩名一見干器之授以詩律其貌陋又免缺而喜  
凌侮嘗謁廉帥誤三拜人號方三拜將薦于朝而卒門  
人謚玄英先生其甥楊弁孫郃編次王贊為序郃又為  
玄英先生傳附

王德興詩一卷

右唐王德興集有次韻和鄭畋詩知其懿億間人也

沈彬詩一卷

右唐沈彬保大中以尚書郎致仕居高安集中有與韋莊杜光庭貫休詩唐末三人皆在蜀疑其同時避亂嘗入蜀云上李昇山水圖詩在焉

熊皦屠龍集五卷

右晉熊皦後唐清泰二年進士為延安劉景巖從事天福中說景巖歸朝擢右司諫坐累黜上津令集有陶穀

序陳沆賞皦早梅云一夜欲開盡百花猶未知曰太妃容德於是乎在

沈顏聲書十卷

右偽吳沈顏字可鑄傅師之孫天復初進士為校書郎屬亂離奔湖南辟巡官吳國建為淮南巡官禮儀使兵部郎中知制誥翰林學士順義中卒顏少有詞藻琴碁皆臻妙場中語曰下水船言為文敏速無不載也性閒淡不樂世利嘗病當時文章浮靡倣古著書百篇取元

次山聳叟之說附已志而名書其自序云自蓋軻以後  
千餘年經百千儒者咸未有聞焉天厭其極付在鄙子  
其夸誕如此

李煜集十卷

右偽唐主李煜重光也璟之子少聰悟喜讀書屬文工  
書畫知音律建隆三年嗣偽位開寶八年王師克金陵  
封違命侯太平興國三年終隴西郡公贈吳王江隣幾  
雜志云為秦王廷美所毒而卒

韓熙載格言五卷

右偽唐韓熙載字叔言北海人後唐同光中進士南奔  
江淮李昇建國用為秘書郎使與其子璟遊璟嗣位為  
虞部員外郎史館修撰兼太常博士知制誥項之請誅  
陳覺黜和州司馬復召中書舍人累遷兵部尚書第宅  
華侈妓樂四十餘人不加檢束時人比徐之才璟欲倚  
以為相用是不果後左授右庶子分司乃盡斥羣妓單  
車引道留為秘書監俄復位已而其去妓皆還上書論

古今之變名格言熙載天才俊敏工隸書及畫聲名冠  
一時自朱元叛後煜頗疑北人多因事誅之熙載愈益  
淫縱然喜延譽後進如舒雅等後多相知謚曰文

潘佑滎陽集十卷

右偽唐潘佑金陵人韓熙載薦於璟授秘書正字直崇  
文館煜時為虞部員外郎史館修撰知制誥中書舍人  
佑性貞介文章瞻逸尤長論議坐言事悖慢下獄自剄  
死人頗言張洎譖之

李有中詩二卷

右偽唐李有中嘗為新塗令與水部郎中孟賓于善賓于稱其詩如方干賈島之徒賓于晉天福中進士也有中集中有贈韓張徐三舍人詩韓乃熙載張乃洎徐乃鉉也春日詩云乾坤一夕雨草木萬方春頗佳他皆稱是

成彥雄梅頂集

右偽唐成彥雄江南進士有劉鉉序

張蠙詩一卷

右偽蜀張蠙字象文清河人唐乾寧中進士為校書郎  
櫟陽尉犀浦令建開國拜膳部員外郎後為金堂令王  
行與徐后游大慈寺見壁間牆頭細雨垂纖草水面回  
風聚落花愛之問之云蠙句給札令以詩進蠙以二百  
首獻行重之將召為知制誥宋光嗣以其輕傲止賜白  
金而已蠙生而穎秀幼能為詩作登單于臺有白日地  
中出黃河天外來之句為世所稱

牛嶠歌詩三卷

右偽蜀牛嶠字延峰隴西人唐相僧孺之後博學有文以歌詩著名乾符五年進士歷拾遺補闕尚書郎王建鎮西川辟判官及開國拜給事中卒集本三十卷自序云竊慕李長吉所為歌詩輒効之

韋莊浣花集五卷

右偽蜀韋莊字端已仕王建至吏部侍郎平章事集乃其弟鶯所編以所居即杜甫草堂舊址故名云偽史稱

莊有集二十卷今止存此

盧延讓詩十卷

右偽蜀盧延讓子善也范陽人唐光化元年進士朗陵  
雷滿辟滿敗歸王建及僭號授水部員外郎累遷給事  
中卒官終刑部侍郎延讓師薛能詩不尚奇巧人多誦  
其淺俗獨吳融以其不蹈襲大奇之

羅隱甲乙集十卷讒書五卷

右杭越羅隱字昭諫餘杭人唐乾符中舉進士不第從

事諸鎮皆無合久而歸錢鏐辟掌書記歷節度判官副  
使奏授司勳郎中梁祖以諫議大夫召不行魏博羅紹  
威推為叔父表薦給事中卒隱少聰明作詩著文以譏  
刺為主自號江東生其集皆自為序

孫光憲羣湖編玩三卷

右荆南孫光憲字孟文陵州人王行降唐避地荆南從  
誨辟掌書記歷檢校秘書監御史大夫王師收閬州光  
憲勸其主獻三州地乾德中終黃州刺史自號葆光子

徐鉉集三十卷

右偽唐徐鉉字鼎臣廣陵人仕楊溥為秘書郎直宣徽  
北院掌文翰李昇時知制誥璟煜時累官為翰林學士  
歸朝為直學士院給事中散騎常侍淳化初坐累黜靜  
難軍司馬鉉初至京師見御毛褐者輒哂之邠苦寒竟  
以冷氣入腹而卒鉉幼能屬文尤精小學為文未嘗沈  
思自云速則意思壯敏緩則體勢疎慢云集有陳彭年

序

李涉歌詩一卷

右唐李涉渤之弟也早從陳許辟一再謫官夷陵大和中為太學博士自號青溪子渤三詩附

賈島長江集十卷

右唐賈島浪仙也燕薊人累舉進士不第文宗時坐飛謗謫長江主簿會昌初終普州司倉參軍島少為僧名無本後從韓愈遂去浮屠

于武陵詩一卷

右唐于武陵大中進士

皎然杼山集十卷

右唐僧皎然撰字清晝吳興人謝靈運十世孫工篇什  
德宗詔錄本納集賢院集前有于頔序并贈畫上人詩

貫休禪月集三十卷

右唐僧貫休撰字德隱姓姜氏婺州人後入蜀號禪月  
大師初吳融為之序其弟子曇域削去別為序引偽蜀  
乾德中獻之

清塞詩一卷

右唐僧清塞字南卿詩格清雅與賈島無可齊名寶歷中姚合為杭州刺史因攜書投謁合聞其哭僧詩云凍鬚亡夜剃遺偈病中書大愛之因加以冠巾為周賀云

虛中碧雲詩一卷

右唐僧虛中也居玉笥山嘗以詩投司空圖酬云十年太華無知己只得虛中一首詩其見重如此

薛濤錦江集五卷

右唐薛濤洪度也西川樂妓工為詩當時人多與酬贈  
武元衡奏校書郎太和中卒李肇云樂妓而上詩者濤  
亦文妖也

修文要訣三卷

右偽蜀馮鑑撰雜論為文體式評其誤謬以訓初學云  
別集類下

柳仲塗集一卷

右皇朝柳開字仲塗大名人開寶六年進士太平興國

中上書願備邊用授崇儀使知寧邊軍徙全桂二州貶  
復州團練副使居久之復官歷環邠曹代忻滄五州咸  
平四年終于京師開幼竒警有膽氣學必宗經慕韓愈  
柳宗元為文因名肩愈字紹先既而易今名字自以為  
能開聖道之塗也集乃門人張景所編歐公常推本朝  
古文自仲塗始

胡周父文集十卷

右皇朝胡旦字周父渤海人太平興國三年進士第一

人知海州上河平頌先是盧多遜趙普罷頌有逆遜投  
荒姦普屏外之句太宗怒貶商州團練副使上平燕八  
議召復官再遷知制誥翟馬周上封事斥時政語連旦  
謫防州團練副使復召知制誥草王繼恩制詞溢美流  
潯州景德初以目病致仕終秘書監為人雋辨強敏少  
有大志力學以瞻博聞雍熙淳化間奏御之文為時推  
賞晚節躋貨多干擾州縣持吏短長時論薄之

寇忠愍詩三卷

右皇朝寇準字平叔華州人太平興國中登進士科淳  
化五年參知政事切直上怒起輒挽衣留以俟處決定  
策立真宗為皇太子景德元年拜平章事契丹入寇決  
親征之策三年出知陝州大中祥符七年同平章事明  
年罷天禧三年復相真宗不豫皇后預政準白上請太  
子監國因令楊億草制且進億以代丁謂詰朝準被酒  
漏言累貶雷州司戶徙衡州司馬卒後詔許歸葬公安  
縣民擁道設祭立竹焚紙竹無根株踰月皆自生民即

其地立祠名其竹曰寇公竹仁宗時贈中書令謚忠愍  
嘗封萊國公初篤學善屬文尤長詩什多得警句在相  
位論議忠直不顧身謀仇邪媒藥既以謫死或又謗之  
云在相位時與張齊賢相傾未能謂天書降乾祐準知  
而不言曾鞏明其不然曰準審如是丁謂拂須固足以  
悅之集有雍敘共二百四十首野水無人渡及江南春  
二首皆在獨到海只十里之詩已亡其全篇矣

王元之小畜集三十卷

右皇朝王禹偁字元之鉅野人家微賤九歲能為歌詩  
畢士安見而異之及長善屬文太平興國八年登進士  
第端拱初試文擢左司諫知制誥判大理寺辨徐鉉罪  
忤旨貶商州團練副使久之復召知制誥入翰林為學  
士孝章皇后崩梓宮遷主第禹偁謂后嘗母儀天下當  
用舊典坐謗訕左遷知滁州真宗即位復召掌誥修太  
宗實錄坐語涉輕誣出知黃州徙蘄州卒年四十八元  
之詞學敏贍獨步一時鋒銳氣厲極談世事臧否人物

金史卷之五十四  
本四中  
以直道自任故屢被擯斥喜稱獎後進當世名士多出於門下集自為序

宋文安集一百卷

右皇朝宋白字素臣開封人年十二善屬文建隆二年進士調嘉州玉津令從太宗平晉獻頌上嘉之累擢翰林學士卒祥符中謚文安白之文頗淳麗而理致或不工典貢舉取王禹偁田錫胡旦時稱得人又名廣平集  
晁文元道院別集十五卷法藏碎金錄一十卷

右五世祖文元公也諱某字明遠澶州人自父始徙家  
彭門幼從王禹偁學太平興國五年進士至道末擢右  
正言直史館知制誥入翰林為學士加承旨春禮優厚  
天禧中祈解近職判西京留司御史臺居六年請老以  
太子少保致仕終少傅年八十四文元諡也國史云公  
樂易淳固守道甚篤雖貴勢無所摧屈嘗言厯官臨事  
未嘗挾情害人以售進保全護固如兔髮膚之傷真宗  
數稱其長者楊億謂其所作書命得代言之體李獻臣

亦言公服膺墳典耆年不倦少過異人指導心要不喜  
術數之說疑文滯義頽質正後已文章典贍書法楷正  
時輩推重自唐以來世掌誥命者唯揚於陵及見其子  
而晁氏繼之延譽後進其門人如宋宣獻晏元憲李邕  
鄆皆為世顯人集皆有自序及李遵勗後序

楊文公刀筆集十卷

右皇朝楊億字大年建州人祖文逸嘗夢一羽人自稱  
懷玉山人覺而億生白毛被體其長盈尺踰月始墮雍

熙初以才名聞年纔十一名至闕下得對面試詩賦授  
秘書省正字宰相等賀得神童淳化中奏二京賦命試  
禁林賜進士第久之直集賢院修永熙實錄獨成五十  
六卷真宗卽位累擢知制誥入翰林為學士祥符中母  
病楊翟謁告不待報歸省俄自以病丐解官以太常少  
卿分司病愈起知汝州復為學士卒年四十七天性穎  
悟自幼迄老不離翰墨為文敏速對客談笑揮毫無滯  
博聞強記於歷代典章制度尤所該通時多取正樂道

人善後進翁然宗之然評品人物黑白太明姦邪疾惡之故屢被讒毀真宗愛其材特保持之僅免焉景祐中王晦叔上其為寇相請皇太子親政疏草仁宗嘉歎特贈禮部尚書諡曰文刀筆集有陳詰序凡三百六十三首

張乖崖集十卷

右皇朝張詠字復之濮州人太平興國初進士累擢至樞密直學士御史中丞禮部尚書卒年七十少好擊劍

兼通術數為文尚氣不事彫飾自號乖崖公知益州恩  
威並著至今人畏愛之錢易所撰墓誌李昉所纂語錄  
附于後

陳文惠愚丘集二卷湖陽編一卷

右皇朝陳堯佐字希元閬州人端拱初進士累遷三司  
副使修永定寶錄擢知制誥歷韶盧壽洛并同雍鄭八  
州景祐四年召拜同中書門下平章事後以太子太師  
致仕年八十二卒號知餘子諡文惠堯佐屬辭尚古不

牽世用喜為二韻詩詞調清警永雋各集皆自有序

孫漢公集三十卷

右皇朝孫何字漢公蔡州人淳化三年應進士殿省俱中第一四遷起居舍人知制誥性下急嘗任京西東兩浙轉運使副頗事苛察幼篤學嗜古為文宗經與丁謂同為王元之所稱時謂之孫丁集有丁謂序

丁晉公集四卷

右皇朝丁謂字公言初字謂之蘇州人淳化三年進士

累遷知制誥出知鄆毫昇三州天禧四年拜平章事俄以戶部罷未幾復相封晉國公乾興中坐擅改永定陵貶崖州司戶更赦徙道州明道末以秘書監召還卒於光州幼聰敏書經目輒記不忘善為古文章尤工詩什儉巧險詖世鮮其儔大中祥符初議封禪未決謂因言大計有餘議遂定當時所奏祥瑞事皆謂及王欽若預焉喜圖畫博奕音律吳人自陸宣公後至謂始相本朝熙寧以前議者莫不指謂為姦邪之首自王安石用事

頗稱其賢智云集皆詩也

劉中山刀筆三卷淝川集四卷

右皇朝劉筠字子儀大名人咸平元年進士三遷右正  
言直史館以司諫知制誥出知鄧陳兩州召入翰林為  
學士嘗草丁謂李迪罷相制既而又命草制復留丁謂  
筠不奉詔遂出知廬州再召為學士月餘以疾知潁州  
三召入翰林加承旨未幾進戶部龍圖閣學士再知廬  
為人不苟合學問閎博文章以理為宗辭尚緻密尤工

篇詠能侔揣情狀音調淒麗自景德已來與楊億以  
文章齊名號為楊劉天下宗之刀筆集并肥川集有黃  
鑑序

鮮于伯圭集一卷

右皇朝鮮于瓌字伯圭閬中人文章為一時之冠累舉  
不第嘗作摠愁詞時人稱之李宗諤贈詩云漢殿無人  
薦揚子滿朝空誦摠愁詩後與宗諤同年第四人登科  
趙普判秦州辟為觀察推官卒

晏元憲臨川集三十卷紫微集一卷

右皇朝晏殊字同叔臨川人景德三年張知白薦得召  
賜同進士出身再試文擢秘書正字為昇王府記室累  
擢知制誥翰林學士寶元三年拜平章事坐撰李宸妃  
墓銘不言上宸妃所出及役共治產事四年罷知潁川  
厯陳許雍洛以疾歸待經席卒性剛峻幼孤篤學為文  
溫純應用尤長於詩抒情寓物辭多曠達當世賢士如  
范文正公歐陽文忠皆出其門女適富鄭公楊察世稱

其知人云集有兩本一本自作序

范文正丹陽編八卷

右皇朝范仲淹字希文其先邠人大中祥符八年進士  
幼隨母適朱氏名悅後復今姓名擢右司諫爭廢郭后  
事出守睦蘇二州以召充天章閣待制知開封獻百官  
圖詆宰相奪職知饒州歷潤越寶元初知永興陝西經  
畧副使涇原帥敗例降官知耀州幾月改環慶遷四路  
經畧招討使慶厯元年召拜樞密副使參知政事明年

宣撫河東陝西俄知邠州病請南陽徙杭青二州卒諡  
文正為學明經術政慕古人事業慨然有康濟之志作  
文章尤以傳道為任事母至孝姑蘇之范皆疎屬置義  
莊以賙給之天下想聞其風采賢士大夫以不獲登其  
門為恥獨梅堯臣嘗著碧雲駮一編以譏詆之云集有  
蘇子瞻序

神明逸詩六卷

右皇朝种放字明逸長安人隱終南之豹林谷咸平中

遣使召赴闕授左司諫累遷諫議大夫給事中祥符八年終工部侍郎放通經史七歲能屬文不喜釋氏常裂佛書以製帷帳著嗣禹說在朝有所啟奏時無知者揚億譏其循默真宗乃出其議十三篇以示輔臣晚年頗縱酒盛輿服王嗣宗知京兆嘗條上其不法詔問狀不娶無子集乃姪孫說所編范巽為之序卷首載真宗詔書及御製詩十首

魏仲先草堂集一卷鉅鹿東觀集二卷

右皇朝魏野字仲先陝州人志清逸以吟詠自娛亡懷  
榮利隱于陝之東郊手植竹木繞以流泉鑿土袤丈曰  
樂天洞前立草堂為詩清苦句多警策與寇準王旦善  
每往來酬唱祀汾陰歲名不起卒贈著作郎集有薛田  
序鉅鹿東觀集乃野之作子閑集其父詩四百篇以贈  
著作故以東觀名集

潘逍遙詩三卷

右皇朝潘閔字逍遙大名入通易春秋尤以詩知名太

宗嘗召對賜進士第將官使之不就王繼恩與之善繼  
恩下獄捕閻甚急久之弗得咸平初來京師尹收繫之  
真宗釋其罪以為滁州參軍後卒于泗上與王禹偁孫  
何柳開魏野交好最密集有祖無擇序錢易張達皆碣  
其墓附于集蘇子瞻少年時過一山院見壁上有詩曰  
夜涼知有雨院靜若無僧而不知何人詩今集載此聯  
乃閻夏日宿西禪院詩也小說中謂閻坐盧多遜黨嘗  
追捕非也

郡齋讀書志卷四中